

Plaidin – il «Wordle» sursilvan

Il giug da lignar «plaidin» ei la versiun romontsch sursilvana dil giug engles «Wordle». El ei vegnius realisau dall'Uniun da giuventetgna Sagogn che ha mess a disposiziun quel avon paucs dis. Tenor il president dall'uniun, *Samuel Maissen*, hagian ins fatg quel per mantener e promover il lungatg romontsch a moda ludica. Sco las versiuns englesas e tudestgas pudess era la romontscha daventar in hit, gia suenter dus dis eran numnadamein varga 200 personas stadas online per sligiar il legn. Tiel «plaidin» eis ei da lignar mintga di in niev plaid cun tschun bustabs, ei dat sis pusseivladads. Tgi che fa part dil giug po era parter ses resultats cun amitgas ed amitgs aschia ch'ins po semesirar. (fmr/sr) **Pagina 3**

«Plaidin» – il giug da cult «Wordle» per romontsch

L'Uniun da giuventetgna Sagogn ha realisau in'engiavineria da plaids romontscha e fatg accessibla ella reit il «plaidin» avon paucs dis. Sco il giug engles «Wordle» pudess era la varianta romontscha prest daventar in hit.

SUSI ROTHMUND/FMR

«Uei, quei ha fatg spert la runda», di *Samuel Maissen* e ri cu el auda pertgei che la FMR telefonescha ad el. Maissen presidescha numnadamein l'Uniun da giuventetgna Sagogn che dumbra 54 commembras e commembers. La FMR ha contactau Maissen per endriescher dapli dil giug «plaidin» e tgei che ha motivau l'uniun da giuventetgna da realisar in tal project.

«Sche nus havessen
stuiu encurir sezs quels
2247 plaids fuss quei
stau in'immensa lavur.»

Samuel Maissen,
informaticher

Uniun activa

30 commembas e commembers dall'Uniun da giuventetgna Sagogn eran dil reminent gest sin viadi en Croazia sur Anceinza. «Mintga dus onns fagein nus in viadi pli grond, nus organsein era Sontgaclau pils affons, separticipin alla fiera dil vitg e fagein parada. Tier nies program s'auda era la fiasta «la colurada» alla quala nus envidein uonn ils 5 da november», declara Samuel Maissen. Il giug «plaidin» hagian els realisau per promover a moda ludica il romontsch che stetti fetg a cor alla giuventetgna.

2247 plaids

Samuel Maissen e siu frar *Alessandro* ein informatichers. Quei seigi segir stau d'avantag per adattar il «Wordle» per utilisaders che san romontsch. Il giug «Wordle» ei «free to use» e stat aschia a disposiziun a tgi che vul translatar ni adattar quel tenor agen giavisch e derasar el. «Nus havein fatg bugen quella lavur», sincere-



Ils informatichers Samuel ed Alessandro Maissen (da sen.) muossan il giug «plaidin», realisau dall'Uniun da giuventetgna Sagogn.

FOTO MAD

scha Samuel Maissen ed aschunta ch'ei seigien stai circa in di vid arcunar ils 2247 plaids en romontsch sursilvan e realisar il «plaidin».

In legn per di

Mintgin da quels plaids ha tschun bustabs – sco tier las variantas en auters lungatgs. Ei dat sis pusseivladads da lignar. A tgi che anfla buca la soluziun cun sis emprovas semuossa alla fin la soluziun. Mintga di dat ei in niev legn. Sco Sa-

muel Maissen di, ei la nova versiun dil dicziunari romontsch – in project publicaus sco open source – staus in grond agid da metter ensem il corpus da plaids pil «plaidin». «Sche nus havessen stuiiu encurir sezs quels 2247 plaids fuss quei stau in'immensa lavur», aschia il president dall'Uniun da giuventetgna Sagogn.

Tgi che vul far in'emprova e rinforzar siu scazi da plaids anfla il giug dil «plaidin» via plaidin.ugsagogn.ch.

Trenar las cellas grischas

SUSI ROTHMUND/FMR

Wordle? Wördle? Plaidin? Duront la sesida matutina da redacziun vegn in niev giug romontsch tematisaus. Il schef declara ch'el seigi in hit ed oravontut la giuventetgna seigi fascinada dil giug ch'ei detti novissimamein era per romontsch. In hit? Ok, jeu hai aunc mai udiu enzatgei da «Wordle» e sco ei para han era mias collegas e mes collegas buc idea tgei che quei ei. Jeu sun denton propi buc ina da giugs, oravontut buca giugs ch'ins dat al computer ni telefonin.

La versiun romontscha d'in giug ch'ei il hit fa denton marveglias ed jeu fetschel l'emprova. Il giug ei aschi sempels sco genials ed ei va gie mo per lignar in plaid mintga di. Ton temps ha mintgina e mintgin che vul exercitar empau il romontsch e trenar las cellas grischas dil tschurvi. Gl'emprem plaid hai jeu lignau, zuar pér culla sisavla e davosa emprova, mo quei fa nuot. 100% success – di il telefonin e quei motivescha da cuntinuar. Jeu less empruvar cul proxim plaid, quei va denton buc. Jeu stoss spitgar entochen l'auter di e sai uss buca propi sche quei ei positiv ni negativ. En mintga cass mir'ins aschia buc uras sil telefonin per dar in giug. L'auter di hai jeu puspei empruau miu cletg ed empriu in plaid che s'udeva buca tier miu vocabulari. «Punar», quei vul dir ton sco «trotzen» – savevas vus quei?

Success e disdetgas pon ins parter cun amitgs e collegas, quei animescha segir aunc pli fetg in ni l'auter. Il pli bi per mei ei denton ch'ei dat la versiun romontscha. Per vies engaschi in grond compliment a tuttas e tuts dall'Uniun da giuventetgna da Sagogn. Cun temps e peda treneschel jeu forsa era plaids engles, tudestgs ni d'auters lungatgs. Donn fai segir buc. Perquei dei in'egliada. Pils affons eis ei bien per slargiar il scazi da plaids e per generaziuns pli veglias eis ei segir ina bun'occupaziun che gida perfin da prevegnir agl emblidar. Nus savein era bugen semesirar, contas emprovas drovas ti? Dai in'egliada sin plaidin.ugsagogn.ch.



iel